

## 2 Vakolinto

<sup>1</sup> une ne Paulo ne n'sung'hua ghwa Kilisite mu lughano lwa Nguluve, nu Timoteo u nyalukolo ghwitu, ku tembile ja Nguluve jino jili ku Kolinto, na vitiki vooni vano vali mukighavo kyoni ikya Akaya. <sup>2</sup> uvumosi vuuve numue nu lutengano kuhuma kwa Nguluve Nhaata ghwitu nu Mutwa Yeesu Kilisite. <sup>3</sup> Aalumbwaghe uNguluve nu Nhaata ghwa Mutwa Yesu Kilisite, umwene ghwe Nhaata ghwa lusaghilo nu Nguluve ghwa luhuvisho lwoni. <sup>4</sup> uNguluve ikutuhuvisho usue mu mhumhuko siitu sooni, neke kuuti tuwesie kuvahuvisho vala vano vali mu mhumhuko. tukuvahuvisho avange mu luhuvisho lula lula luno uNguluve alyatumiile kukutuhuvisho usue. <sup>5</sup> ulwakuva ndavule ulupumhuko lwa Kilisite lukwongelela vwimila jiitu, vule vule ulukeelo lwitu lukwongelela kukilila uKilisite. <sup>6</sup> neke ndeve mhupumusuvua vwe vwimila ulukeelo lwinu nu vuvangi vwinu. kange nave tuhuvisho, vwe vwimila vwa luhuvisho lwinu luvomba imbombo kinyilifu pano muva mu mhumhuko ku lugudo ndavule usue pano tulyapumwike. <sup>7</sup> nu lukangasio lwitu mu lyumue vwe vukan-gafu. tukagula kuuti ndeve vule fino mukilila imhumhuko, vule vule mukilila uluhuvisho. <sup>8</sup> ulwakuva natulonda umue muve vajaasu, vanyalukolu, imhumhuko sino tulyale naso ukuo ku Asia, tulyavonelilue kukila vule tuwesia kupinda, kuuti natulyale nambe nu luhuvisho

lwa kukukala kange. <sup>9</sup> kyang'haani tulyahighilue kufua. neke uluo lulyale kukutuviika usue tuleke kuva nu luhuvisio lwitu twevene, pepano tuvike uluhuvisio lwitu kwa Nguluve, juno isyulula avafue. <sup>10</sup> alyatupokile usue kuhuma muvufue, ilikutupoka kange. tuvikile ulukangasio lwitu mwa mwene kuuti ilikutupoka kange. <sup>11</sup> akavombile ndiki ndavule umue pano mukututanga mu nyifunyo siinu. pe pani vinga vilikuvahongesia kukilila usue vwimila ulughano ulukome vwa vumosi vuno tupelilue usue kukilila inyifunyo sa vinga, <sup>12</sup> tukughinia mu ili: amasio gha masaghe ghiitu. ulwakuva vwe vufumbue uvunono nu vuvalafu vwa Nguluve kuuti tulyalutiile jusue mu sa iisi. tuvombile ndiki kyongo numue, nakwekuti mu vukoola vwa iisi, neke pepano mu vumosi vwa Nguluve. <sup>13</sup> natukuvalembela kyokyoni kino namuwesia kukwimba na kukwelevua. nili nu vukangasio. <sup>14</sup> kuuti lubale mutwelevilue. nili nu lukan-gasio kuuti ikighono kya Mutwa Yeesu tuliva vwimila mu kidada kiinu, ndavule fino muliiva kulyusue. <sup>15</sup> ulwakuva nilyale nu vukangafu mu ili, nikanoghilue kukwisa kulumue taasi, neke kuuti muwesie kukwupila uluvumbulilo ulwa kughendelua kavili. <sup>16</sup> nikale nipanga kukuvaghendela un'siki ghuno niluta kuMakedonia, kange un'siki ghuno nigomoka kuhuma kuMakedonia, munue kukun'sugha un'siki ghuno niluta kuvuYahudi. <sup>17</sup> pano nilyale nisagha mu ili, pe nikale nikana kana? pe nipanga imbombo kuling'hana nu vukome vwa vumuunhu, neke kuuti niti “Eyo, ndali” ni “Ndali, “Ndali”

mu n'siki ghumo? <sup>18</sup> neke hwene vule uNguluve nywilifu, natujova fyonu kuuti “Eyo” ni “Ndali” <sup>19</sup> ulwakuva umwana ghwa Nguluve, uYesu Kiisite junu uSilvano, uTimoteo nune tulyapulisie kulumue, nakwekuti “eyo” na kuti “ndali” umwene ghwe “Eyo” un'siki ghwoni. <sup>20</sup> ulwakuva ulufingo lwoni lwa Nguluve lwe Eyo. nkw lino kukilila umwene tuuti Amen ku vwimike vwa nguluve. <sup>21</sup> lino ghwe Nguluve junu ikutwimisia usue palikimo numue mwa Kilisite, kange alyatusung'hile usue. <sup>22</sup> alyavikile ikivalilua pakanyanya jitu kange akatupeela uMhepo mu numbula siitu ndavule uvuvaha vwa kila kino ale ikutupeela uviise. <sup>23</sup> pe pano nikun'suuma uNguluve, am'bule une lweluki lunolunivombile une kuleka kukwisa ku Kolitho kuuti nilava n'sigho kulumue. <sup>24</sup> ulu nakwekuti tughesia kusigha ndavule ulwitiko lwinu vuno lunoghiile kuuva. pepano tuvomba palikimo numue vwimila mu lukeelo lwinu, ndavule pano mukwima mu lwitiko lwinu.

## Ikihwani kya 2

<sup>1</sup> lino nikalamwile nu mwojo ghwango kuuti, nanikwisa kange kulumue kukuvalemasia amoojo ghiinu. <sup>2</sup> ulwakuva une ningavapelele umue kuuva nuulusukunalo, kwekuuti nakwale junu kyaikumhelela une niive nu lukeelo, looli jumue mwe vano nivalamisie mu moojo ghiinu. <sup>3</sup> fye nambe nikavalembile mu kalata jila kuti, ningiise kulumue nileke kulemasivua mu mwojo ghwango na vaanhu vano vaveele vanoghiile kukumhela nihovoke, nikagwile

kuuti ningave nu lukeelo, na jumue mweni muvisaghe nulukeelo. <sup>4</sup> pano nikavalambiile ikalata vwimila imumuko imbaha nu lusukunalo ulukome ni misosi minga. looli nalondagha mukagule vule nili nu lughano ulukome kulumue. <sup>5</sup> liino umuunhu ghweni juno apeleleliile kulemala mu mwojo, naandemisie juune, looli avalemisie najumue. neke lino nanilonda kuviika uluo kuuva lutalamu kyongo kulumue. <sup>6</sup> ulukwegho lunolumwaaghile umuunhu ujoo kuhuma kiviinga mulumue lunkwilile. <sup>7</sup> lino, munoghile kukunsaghila na kukunkangasia umuunhu ujoo, kuuti aleke kusukunala kyongo kuhanga afue umwojo. <sup>8</sup> liino, nikuvasuuma mumhufiqghe kuuti mumughanile. <sup>9</sup> uvufumbue vwango vwa kukuvalembela ikalaata jila, vulyale vwa kukagula nave mukumulika mu sooni. <sup>10</sup> pano mukunsaghila umuunhu, najuune ninsaghiile. ulwakuva nave pwelili lino ninoghiile kusaghila, nisaghiile pamaaso gha Kilisite vwimila umue. <sup>11</sup> ulwa kuuti, uSetano aleke kukutulema, ulwakuva tukagwile uvusufu vwake. <sup>12</sup> lino, ye nifikile kulikaaja lya Tuloa kupulikisia imhola inofu ija Kilisite, uMutwa akandindulila umulyango ughwa kuvomba imbombo jaake kula. <sup>13</sup> neke nanikatenganile mu mwojo ghwango, ulwakuva nanikamwaghile kula unyalukolo ghwango uTiito. pe nikahwesia nikavuuka kuluta ku Makedonia. <sup>14</sup> neke tukumwongesia uMutwa ulwakuva mwa Kilisite ikutulongosia jaatu kulefia avalugu. kange ikutupelelausue kukwisia uvukagusi vwa mhola

sa Kilisite imbale sooni, ndavule ulunusi ulunono vule lukwilana. <sup>15</sup> ulwakuva kwa Nguluve usue tulindavule ulunusi ulunono lwa Kilisite luno lukuvafikila vooni, vanovipokua na vano visova. <sup>16</sup> ku vano vipokua ulunusi uluo lunono, lukuvapeela uvwumi. neke kuvano visova, ulunusi uluo luviivi, lukuvapeela uvufue. lino ghwe veeni juno anoghiile kuvomba imbombo ijio? <sup>17</sup> usue natulindavule avaanhu vinga vano vavikile ilisio lya Nguluve hwene kiinu kya kughusia. looli mu ngufu isa Kilisite, tupulikisia ilisio lya Nguluve mu vugholofu vwoni pa maaso gha Nguluve ndavule utusaghile.

## isura ija 3

<sup>1</sup> asi, musagha kuuti tutengwile kange kukughinia? jeeje, usue natulindavule avaanhu avange vano vikuvaletela ikalata isa kujoleka kulyumue, nambe kusuma ikalata kulyumue isa kuvoleka ku vaanhu avange. <sup>2</sup> umue mwemue kalata jinojikutwoleka usue, jino jilembilue mu moojo ghiitu, jino jikagulika na kukwimbua na vaanhu vooni. <sup>3</sup> kange muhufia kuuti, umue mwemue kalata jino jihumule kwa Kilisite, jino tuvaletiile usue. najilembilue ni kilembilue, looli jilembilue nu Mhepo ghwa Nguluve juno mwumi. kange namuli ndavule ikalata jino jilembilue mu kisseghu, looli jino jilembilue mu moojo gha vaanhu. <sup>4</sup> tujova isio ulwakuva uluo lwe luhuviilo lwitu kwa Nguluve vwimila sino uKilisite atuvombile usue. <sup>5</sup> nakwekuuti tusaagha kuuti tuvomba kimonga mu ngufu

siitu ulweene ingufu siitu sihuma kwa Nguluve. <sup>6</sup> unguluve ghwe juno atupeliile ingufu isa kuuva vavombi va lufingo ulupia kuhuma kwa Mhepo uMwimike. ulufungo uluo nase ndaghilo sino silembilue, ulwene lwa Mhepo uMwimike, ulwakuva indaghilo sino silembilue sileeta uvufue, looli uMhepo uMwimike ileeta uvwumi. <sup>7</sup> indaghilo sino silyalembilue mufiseghu, sino sinosilyaletile uvufue, silisile movuvaha vuno vuvalatika, kuhanga avaislaeli vakakunua kuku-mulola uMoose kumaaso ulwakuva uvuvaha uvuo vulyavalatiike unsiki ndebe vuvule. <sup>8</sup> asi lino imbombo ija Mhepo uMwimike na je jiva nu vuvaha kukila? <sup>9</sup> nave imbombo jiva jipelelela avaanhu kuhighua jili nu vuvaha, lino imbombo jino jipelelela kuuva vagholofu pamaaso gha Nguluve najiiva nu vuvaha kukila? <sup>10</sup> lino uvuvaha vwa lufingo ulukuulu, navuling'hana nu vuvaha ulwa lufingo ulupia, <sup>11</sup> ulwakuva vwa lufingo ulupia vukome kukila. nave kino kyale kya nsiki n'debe vuvule kulyale nu vuvaha, lino kya jaatu kiiva nu vuvaha kukila <sup>12</sup> lino tuvomba kisila vwoghofi, ulwakuva ulwakuva uluo lwe luhuviilo lwitu. <sup>13</sup> kange usue natuvomba ndavule uMoose juno alisighile kumaaso ni kitambala, kuuti aVaislaeli valeke kukuvwagha uvusililo uvwa luvalatiko. <sup>14</sup> neke avaisilaeli uluhala lwave luyadindilue. umpaka lino pano vikwimba ifilembua fya lufingo ulukuulu, vikunua kugagula uvwakyang'haani, viiva hwene vasighilue ikyenda ikio. uvwakyang'haani uvuo vukaguli vvimila kukumwitika uKilisite, ulwakuva

ndavule kukusivua ikyenda ikio. <sup>15</sup> se seene, kuhanga kufika umusyughu, pano vikwimba ifilembua ifya ndaghilo sa Moose, amoojo ghaave ghasighilue vikunua kukulutang'hania. <sup>16</sup> neke umuunhu ghweni juno ikumwitika uMutwa, uMutwa ikum'busia ikyenda ikio. <sup>17</sup> lino, uMutwa ghwe Mhepo, pano pwale uMhepo ghwa Mutwa pali nu vwavuke. <sup>18</sup> liino usue tweni twe vano natusighilue kumaaso ni kyenda tuku-vwagha uvuvaha vwa Mutwa. UMutwa juno ghwe Mhepo, ghwe ikutuhambusia tuhwanane nu mwene, ikutuhambusyagha kuhuma uvuvaha kufikila uvuvaha uvukome kukila.

## uvwandulilo uvwa 4

<sup>1</sup> ulwakuva uNguluve mu lusungu lwake atupeliile imbombo iji, natudendevuka. <sup>2</sup> ulwene, tukanile lwoni kuvomba isa kuvusyefu inya sooni. nambe natukuvasyanga avaanhu, nambe kuhasing'hania ilisio lya Nguluve nu vudesi. looli, tujova uvwa kyang'haani pa vuvalafu, neke avaanhu vooni vakagule mu moojo ghaave kuuti tuli va kyang'haani pa maaso gha Nguluve. <sup>3</sup> neke nave iMhola inofu jino tupulikisie jisighile kuvoneka, jiiva jisighilue ku vano visova. <sup>4</sup> ulwakuva kusalula vavuo, uSetano juno ghwe m'baha ghwa iisi iji, akupile uluhala lwa vanonavikumwitika u Yeesu. wimila uvuo, vikunua kukulwagha ulumuli ulwa Mhola inofu ija vuvaha vwa Kilisite, juno ghwe kihwani kya Nguluve. <sup>5</sup> ulwakuva usue natupulisia imhola siitu, looli tupulusia kuuti, uYeesu Kilisite ghwe Mutwa, najusue tulivavombi viinu mulwa

kum'bombela uYeesu. <sup>6</sup> ulwakuva uNguluve ghwe mwene juno alyatiile, ulumuli lulimulika kuhuma mung'hiisi, ghwe mwene imulika amoojo ghiitu, na kukutupeela kukagula uvuvaha vwake vuno vuvalatika ku maaso gha Yeesu Kilisite. <sup>7</sup> usue twe vano tuli ndavule ifikog'holo fya nhapo, tupelilue ulumuli uluo, neke likagulike kuuti, ingufu imbaha isa kuvomba imbombo ijio na siitu, sihuma kwa Nguluve. <sup>8</sup> sikutuvona imhumhuko sino sili papinga, neke natulemua, tuuva ni ng'haani ng'haani, neke natufua umwojo. <sup>9</sup> avaanhu vikutupumusia, neke uNguluve naikutuleka tweveene, vikututwasia paasi, neke natufua. <sup>10</sup> ifighono fyooni amavili ghiitu ghali mulutalamu ulwa kufua ndavule uYeesu kuuti uvwumi vwa Yesu vuvoneke mu mavili ghiitu. <sup>11</sup> ulwakuva usue twe vano tuli vwuumi, jaatu tuli mu lutalamu ulwa kufua vwimila uYesu kuuti, uvwumi vwake vuvoneke mu mavili ghiitu ghano ghifua. <sup>12</sup> vwimila uluo, usue tuli mu lutalamu ulwa kufua, mu uluo umue mukava vwumi. <sup>13</sup> mu malembe amimike ghalembilue amasio ghano ghiiti, nilyamwitike uNguluve fyenambe nilyajovile. najusue tui nu lwitiko ndavule uluo. fyenambe tujova. <sup>14</sup> tukagwile kuuti uNguluve juno alyansusisie uMutwa uYesu ilikutusyusia na jusue. ulwene ilikutuviika palikimo numue, kuuti tukale nu Yesu. <sup>15</sup> lino, imhumhuko sooni tukwupila vwimila umue, kuuti ulusungu lwa Nguluve luvafikie avaanhu vinga, neke vamuhongesyaghe fiijo uNguluve. mu uluo uNguluve ighinisivua. <sup>16</sup> lino natudendevuka, nambe amavili ghiitu



ghisakala, looli, n'kate mumoojo ghiitu. UN-guluve ikutupela kuuva vapia ifighono fyoni. <sup>17</sup> ulwakuva ulupumuko lwitu lupepe, kange lwa n'siki n'debe vuvule. ulupumuko uluo luku-tuling'hanikisia uvuvaha uvwa kuvusila kusila. uvuvaha uvuo vukome kukila, vukutupelela kuvona imhumhuko isi nakiinu. <sup>18</sup> ulwakuva natulola vwimila ifinu fino fivoneka, ulwene vwimila ifinu fino nafivoneka. ifinu fino fivoneka fya n'siki n'debe vuvule, looli fino nafivoneka fya jaatu.

## **uvwandulilo vwa 5**

<sup>1</sup> tukagwile kuuti amavili ghiitu kye kyeve kya n'siki n'debe mu iisi muno. neke kyang'hanangike, uNguluve ilikutupeela uvukalo kukyanya uvwa kusila na kusila vuno navuli ndavule ilikaaja lino lijengilue na mavoko gha vaanhu. <sup>2</sup> ulwakuva mu iisi muno amoojo ghitu ghipumuka mu uluo tuli nu vusyukue uvukome uvwa kuluta kuvukalo vwitu uvwa kukyanya, ukuo uNguluve ilikutufywika amavili amapia. <sup>3</sup> tusyukilue mu ulu, kuuti mulwa kufwikua, apuo natuuva vufuula. <sup>4</sup> pano yu jii ghe mu ma vuli agha ghano gha kyeve kya n'siki n'debe tupumuka mu moja ghiitu mu lwa kufua mu nyinga. na kwe kuuti tulonda kufuula um'bili ughu ghuno ghufua, ulwene tulonda kufwikua um'bili ghuno naghufua, kuuti um'bili ughu ghuno ghufua ghugulubikue na ghuno naghufua. <sup>5</sup> uNguluve ghe juno atuling'hanisie uluo, utupeliile uMhepo ghwake neke tukagule kuuti kyang'haani fye tiliiva. <sup>6</sup> jaatu tuli nu

luhuviilo nambe tukagwile kuuti, pano tulu mu m'bili ughu tulipatali nu Mutwa. <sup>7</sup> tukukala vwimila ulwitiko, na kwe kuuti vwimila fino fivoneka mu uluo mwe tukangalika. <sup>8</sup> kange tuvona ye kuba twale tughuleke um'bili ughu na kuluta kukukala nu Mutwa. <sup>9</sup> lino tuve muvukalo uvu, nambe natuuve muvukalo uvu, uvufumbue vwitu kukumuhovosia uMutwa. <sup>10</sup> ulwakuva usue tweni tulikwima pamaaso gha Kilisite nakuhighua nu mwene, neke nujunge ilikwupila uluhombo vwimila sino avomba mu iisi muno, siive nnofu nambe siive mbiivi. <sup>11</sup> lino, ulwakuva tukaghwile kuuti lunoghiile kukumwohopa uMutwa, tughimba kukuvavula avaanhu kuuti vamwitikaghe. uNguluve atukagwile vunono vuno tulivuo, najune nihuviila kuuti na jumue mutukagwile vunono. <sup>12</sup> natulonda pikughinia kange kulumue, looli tulonda kukuvavuula kino kinoghiile kukughinia vwimila usue, kuuti muve na masio agha kuvamula vano vikughinia vwimila sino sivoneka pa maaso, vikusileka isa mu mwojo. <sup>13</sup> ulwakuva, nave tuvoneka tulivanyalukwale, tuli enendiiki vwimila mwa Nguluve, kange nave tuvoneka tuli nu luhala vwe vwimila umue. <sup>14</sup> ulughano lwa Kilisite lukutulungosia usue, ulwakuva tukagwile kuuti umuunhu jumo alwafwile vwimila avaanhu vooni, mu uluo avaanhu vooni valyafwile. <sup>15</sup> UKilisite alyafwile vwimila avaanhu vooni kuuti, avaanhu valekaghe kukukala mu vughane vwake, looli mu vughane vwa juno alyafwile na kusyuka vwimila aveene. <sup>16</sup> lino kuhuma un'siki ughu, natukun'kagula umuunhu

mulwa m'bili. na pano un'siki ghumonga tukan'kagwile uKilisite mulwa m'bili, neke liino natukun'kagula mu uluo. <sup>17</sup> umuunhu ghweni juno alimwa Kilisite, ujoo avumbiike vupia, isa movukuulu sikilile, lino uvumuunhu vwake vupia. <sup>18</sup> neke isi sooni sihuma kwa Nguluve juno alyansung'hile uKilisite atusambanie usue nu mwene, kange atupeliile imbombo ija kupulisia imhola ijio ija kusambana nu mwene. <sup>19</sup> kwekuuti kukilila uKilisite, uNguluve ikuvasambania avaanhu nu mwene, kisila kuvalilila uvuhosi vwaave. kange atupeliile imbombo ija kuvavuula avaanhu imhola ija lusambanio. <sup>20</sup> lino, uKilisite atusung'hile kuvomba imbombo jaake, neke kukilila usue uNguluve ikuvasimilisia kusambana nu mwene. fwe nambe tukuvasuuma vwimila uKilisite kuuti: "musambane nu Nguluve! <sup>21</sup> UNguluve alyam'bikile uKilisite unsila vuhosi, kuuva mhosi vwimila usue, kuuti pano tuuva vaanhu va Kilisite ujoo, tuvisaghe vagholofu pa maaso gha Nguluve.

## Uvwandululo vwa 6

<sup>1</sup> lino, ulwakuva tuvomba imbombo palikimo nu Nguluve tukuvasuuma kuuti ulusungu lwa Nguluve luno mwupile mulekaghe kuuti lusove vuvule. <sup>2</sup> ulwakuva uNguluve iiti, un'siki ghuno ghukanoghiile nikapulike, ikighono ikya vupoki nikakutangile pulikisia, un'siki ghuno ghuno ghunoghiile ghwe ughu, ikighono ikya vupoki kye iki. <sup>3</sup> lino, natuvomba lumonga luno lukuvasia avange, kuuti uvuvombi vwitu vuleke ku-

jovua fivi. <sup>4</sup> ulwenen mu sooni tuhufia kuuti tuli vavombi va Nguluve. Tuli vavombi vaake mulwa kuguda fiijo mu mhumhuko na mu nhalamu nyinga. <sup>5</sup> kutovua, kudindilua mu ndinde, tukwovelua na mapugha gha vaanhu, tuvomba imbombo inhalamu, tilinda na kughonela. <sup>6</sup> kange tuhufia muvugholofu, mu vukagusi, mu lugudo, mu vukoola, mulwa kulongosivua nu Mhepo uMwimike, nu lughano ulusila vukedusi. <sup>7</sup> kange tuli vavombi vaake mulwa kupulisia imhola ija kyang'haani, mu ngufu sa Nguluve. uvugholofu kye kilwilo kuuti, ulubale ulwa ndia nu lwa ng'highi. <sup>8</sup> usue tutavwile, avaanhu vatughinie nambe vatubenapule, vatupaale nambe vatujove fiivi, tuvoneka tuli vadesi himbe tujova isa kyang'haani. <sup>9</sup> tuvomba imbombo heene natukaguliike himbe tukaguliike vunono. -tuvomba imbombo hene vano vifua kange lolagha! tujighe tuli vwuumi. tuvomba imbombo heene tupumusivua vwimila vwa maghendele ghiitu, na kwe kuuti ndavule avaanhu vano vahighilue nambe kwe kufua. <sup>10</sup> tuvomba imbombo heene tuli nu lusukunalo, neke jaatu tuli nu lukeelo. tuvomba imbombo hene tulivakotofu, neke vinga vatupeliile uvumofu. tuvomba imbombo heene natukava kimonga ulwene tuli ni fiinu fyoni. <sup>11</sup> mwe va Kolinto, tujovile numue kisila kufisa kimonga, kange tujovile nu lughano ulukome. <sup>12</sup> usue natu vuhilile kukuvagha umue looli umue, mu nyivonelo siinu, muvuhilile kukutwagha usue. <sup>13</sup> lino, nijova numue hene nijova na vanango, muvisaghe nu lughano ulukome kulyusue, ndavule

usue tulivuo. <sup>14</sup> namungavisaghe nu vu hangilanisi na vaanhu vano navitiki. ulwakuva uvugholofu nu vuhosi ndepoonu fiiva vumo ndaani? nambe ulumuli ni ng'hiisi ndepoonu fiiva pepamo? <sup>15</sup> kange uKilisite nu Beliari ndepoonu vipuling'hana? nambe umwitki na juno namwitiki, ndepoonu viiva nu vuhangilanisi vuki? <sup>16</sup> inyumba inyimike ija Nguluve ndepoonu jiva vumo ni fihwani ifya manguluve? usue tuli nyumba inyimike ija Nguluve juno mwumi, ndavule uNguluve jujuo vule alyajovile." nili kukala mu veene. na kughenda palikimo na veene. Niliva Nguluve ghwave, voope viiva vaanhu vango. <sup>17</sup> lino uMutwa iiti, "muvuuke pakate pa veene, mubaghule vano namungakolaghe ikiinu ikilamafu, najune pe kyanikuvupila. <sup>18</sup> niiva nhaata ghwinu, najumue muuva vaswambango na valivango,' uMutwa unyangufu sooni, ijova.

## uvwandulilo vwa 7

<sup>1</sup> lino, vaghanike vango, uNguluve afin-gile kukutupeela isio sooni sino alaghile, tu-valasyaghe mu sooni sino sikutupelela ku-uva valamafu amavili na moojo ghiitu. tu-visaghe vimiike mulwa kumwoghopa uNguluve. <sup>2</sup> mutwupile mu moojo ghiinu, ulwakuva nakwale juno tumuhokile, nakwale juno tumulemisie. natunyanyile nambe jumonga. <sup>3</sup> nanijova ulu mulwa kuvapiika. ulwakuva ndavule nikajovile ulutasi kuut, umue muli n'kate mu moojo ghiitu, tulipalikimo mu vwumi uvu, nambe kuuve kwe kufua. <sup>4</sup> nilin'sila

vwoghofi, kange nikughinia vwimila umue, mung'hangisie fiijo, na pano kupumuka mu nyinga, mumbikile niive nu lukeelo ulukome. <sup>5</sup> ye tufikile ku Makedonia, tukakunilue ulwakuva tukale ni mhumhuko imbale sooni; kunji kukale nu vulugu mun'kate mu moojo ghiitu mukale nu ludwesi. <sup>6</sup> neke uNguluve unya kuvakangasia vano vali mu vukaming'hanilua mu moojo ghaav, akatukangasia mulwa kwisa uTiito. <sup>7</sup> nakwekuti uNguluve akatukangissie mulwa kwisa uTiito lwene, looli na vule mukan'kangisie umwene. akatwoliike vule munsyukilue une, na vule musukunala na kukun'hangajikila une. isio simheliile kuhovoka kyongo. <sup>8</sup> palikimo na kuva, ikalata jino nikavalembile jika vapediile ulusukunalo nanikupiika. looli nikupiika vwimila ikalata ijio ye niwene jikavapediile umue muuve nu lusukunalo. poope mukale nu lusukunalo mu n'siki n'debe vuvule. <sup>9</sup> lino nili nu lukeelo, nakwekuti nili nu lukeelo ulwakuva mukaale nu lusukunalo, jeeje. ulwene nili ulwakuva ulusukunalo lwinu lukavapediile mulate uvuhosi vwinu, ulusukunalo lwinu lukaale mu vughane vwa Nguluve, mu uluo na tukavalemisie vwimila sino tukavalembile. <sup>10</sup> ulwakuva ulusukunalo luno lukwisa vwimila, uvughane vwa Nguluve lupelela ululaata luno lupelela uvupoki kisila kuuva nu lupiiko, looli ulusukunalo luno lukwisa vwimila imbombo sa mu iisi, luleta uvufue. <sup>11</sup> lolagha! ulusukunalo luno lukwisa muvughane vwa Nguluve, luvapediile kuuva ni kivavilisi ikya kuvomba sino sinoghiile, luvapediile kukujoleka kuuti sino muvomba sa kyang'haani

kukalalila uvuhosi, kukumwoghipa uNguluve, kusyukua kkum'bona, na kuvona kuti juno ahokile upiile uluhombo lwake. mu isio sooni muhufisie kuuti muli vasila n'kole. <sup>12</sup> lino, nambe nikavalembiile umue, nanika valembiile vwimila mwa muunhu juno amhokile ujunge, nambe juno uvuhosi vumpumwisie. looli nalondagha kuuti mukagule jumue pa maaso gha Nguluve vule mukaghimbile kukutavula vwimila usue. <sup>13</sup> mu uluo mutukangisie. palikimo nuluo tuhovoka kange tuli nulukeelo vwimila, ulukeelo lwa Tiito vule mweni mukamhovwisie mu mwojo. <sup>14</sup> ulwakuva nanikale ni soni, ndave nikighinisie kwa mwene vwimila umue. sooni sino twavavulagha sikaale sa kyang'haani. enendiki na sino tukavaghinisie umue kwa Tiito, soope sivonike kuuti sa kyang'haani. <sup>15</sup> ulughano lwake kulyumue luvaha kyongo, na pano ikumbuka uvukundi vwinu mweni na vule mukamwupiile vunono, kange nu vwoghofi. <sup>16</sup> nihovwike ulwakuva lino ninoghiile kukuvahuviila lwoni.

## uvwandulilo vwa 8

<sup>1</sup> lino, vanyalukolo viitu tulonda umue mukagule vule uNguluve afisungukiile ifipugha fya vitiiki ku makedonia. <sup>2</sup> un'siki ghwa ngelo imbaha sa mhumhuko, ulukeelo lwave uluvaha palikimo nu vukotofu vwake, kulyavapeleliile kuuva nu vumofu vuvaha vwa vukoola. <sup>3</sup> nikuvavuula kuuti valyatavwile ifinu finga, kukila vule valyale. <sup>4</sup> kange valatavwile mu vughane vwake na kukutupelepesia kuuti vavisaghe vuhangilanisi nusue mu mbombo ija

kuvatanga avitiki. <sup>5</sup> valyavombile uluo kukila vule tulyale tuhuviila. vakitavwile taasi kwa Mutwa, neke vakitavula vavuo kulyusue mu vughane vwa Nguluve. <sup>6</sup> lino, tukampelepesia uTiito kuuti iise avatange kumala imbombo ijio, ulwakuva ghe juno akatengwile imbombo ijio kulumue. <sup>7</sup> ndavule muli vamofu mu sooni - mu lwitiko, mukipelua ikya kupulisia, mu vukagusi, kughimba, paliimo na mulughano lwinu kulyusue. lino muvisaghe vamofu na mu mbombo iji ija kuvatanga avange. <sup>8</sup> pano nijova isi nakwekuuti nilonda kukuvumulisia, ulwene nikuvavuula imhola isa vange ndavule vighimba, kange nilonda kulola ulughano lwinu ndave lwa kyang'haani. <sup>9</sup> ulwakuva umue mukagwile vule uMutwa ghwitu uTeesu Kilisite alyavasungukile, na pano alyale mmhofu, akivika n'kotofu vwimilaumue. neke mu vukotofu vwake, umue muuve vamofu. <sup>10</sup> lino, vwimila imhola iji nikuvavuula luno lunoghiile kulumue umwaka ghuno ghwakila, namwakela kutengula kuvomba lumonga. u lwene mwava munoghelua kuvomba. <sup>11</sup> lino, ndavule mukaale mu noghelua fiijo kuvomba uluo ye mutengula, mumale imbombo ijio. <sup>12</sup> ulwakuva muli nu vunoghelua vwa kuvomba imbombo iji, uluo lunofu kange lukwitikisivua. neke lelo luvisaghe mulwa fino umuunhu alinafyo nakwekuti fino naalinafyo. <sup>13</sup> uvufumbue vwa mbombo iji, nakwekuuti umue mudujue nu n'sigho ughwa kutanga avange, neke aveene vavisaghe kwaki, ulwene tulonda mulig'hanaghe. <sup>14</sup> un'siki ughu pano mulinifiinu finga, muvatangaghe vano



navali nafyo neke voope pano viliiva ni fiinu finga vilikuvatangaha umue, mu uluo muuva muling'hiine. <sup>15</sup> ulu luli ndavule lulembilue," juno alinafyo finga, naakale ni fya kisighala, kange juno akale nafyo fidebe naakaghilue. <sup>16</sup> nikumwongesia uNguluve juno ampeliile uTiito umwojo ughwa kuhimba kukuvatanga umue, ndavule nili naghwo une. <sup>17</sup> nakwekuti ye tukun'suma akakundile lwene, mu uluo ghwope akale nu vusyukue uvwa kwisa kukuvatanga. akisile kulumue nu vughane vwake jujoo. <sup>18</sup> tukunsung'ha nu nyalukolo ghwitu ujunge juno ifipugha ifya vitiki fikumughinia mu mbombo ija kupulisia imhola inofu. <sup>19</sup> nalwe lululuo lwene, looli kange ifipugha ifya vitiki fikansalwile unyalukolo ghwitu ujoo kuuti avisaghe palikimo nusue pano tutwala ulutango ku vaanhu. imbombo ijoo, jikumughinia uMutwa, kange jihufia vule tuhimba kukuvatanga avange. <sup>20</sup> natulonda tupikwaghe nu muunhu ghweni vwimila usue nambe ni mbombo jino tuvomba. <sup>21</sup> tukulolelela fiijo kuvomba vunono, nakwekuti pa maaso gha Mutwa lwene, looli na pa maaso gha vaanhu. <sup>22</sup> kange tukunsung'ha unyalukolo ghwitu ujunga aave palikimo navuo. ke kinga tumwaghile kuuti ali ni kivavilisi kuvomba imbombo nyinga. nambe lino alinikivavilisi fiijo ulwakuva ikuvahuviila umue. <sup>23</sup> lino nave umuunhu ilonda kukagula imhola sa Tiito, uju m'bomb mbombo n'jaango mulwa kuvatnaga umue. neke nave ilinda kukagula imhola sa vange, avuo vanyalukolo viittu, vasung'hilue ni fipugha fya vitiki. voope vukumughinia ukilisite.

24 lino, muvahufyaghe avaanhu avuo ulughano lwinu, neke ifipugha ifya vitiki fikagule kuuti sino tukughinia vwimila ume se seene.

## Uvwandulilo vwa 9

<sup>1</sup> lino lunono fiijo kulyune kukuva lembela vwimila, ulutango lwinu ku vitiki. <sup>2</sup> nikagwile umwojo ghwinu ughwa kuvatanga avange, ghuno najune nikughinia vwimila umue ku vaanhu ava ku Makedonia. nikavavulile kuuti, ikipugha ikya vitikiava kukighavo ikya Akaya vakiling'hanisie kuhuma umwaka ghuno ghwak-ila. umwojo ghwinu ughuo ghuvapeliile vinga mu veene kuuva nu mwojo ughwa kutavula. <sup>3</sup> lino nivasung'hile avanyalukolo viitu ava kuuti, ulughinio lwitu vwimila umue luleke piiva lusila luvumbulilo, mu lwa kuuti mwale muuva mul-ing'hanisie, ndavule nikajovile. <sup>4</sup> ulwakuva nave nisiile ukuo palikimo nu muunhu ghweni ughwa ku makedonia na kuvona namul-ing'hanisie, mwale muuva mutukosekisie isoni - nanijova kiinu kulumue - ulwakuva nilin'kali fiijo vwimila umue. <sup>5</sup> lino nivwene lunono nivasuume avanyalukolo viitu ava valongole ukuo kuuti, valing'hanikisie ng'haani uluvonolo ndavule luno mukalaghile. mu uluo muuva mutavwile nu mwojo um'balafu, nakwekuti jumonga iiva avumilisie. <sup>6</sup> mukumbukaghe kuuti, umuuhu juno ivyala fidebe, ipeta fidebe, juno ivyala vwimila uufumbue vwa lufunyo ikava ulufunyo. <sup>7</sup> umuunhu ghweni atavulaghe ndavule alamwile mu mwojo ghwake, alekaghe kutavula nu lusukunalo nambe kukwumilisivua.

ulwakuva uNguluve ikumughana umuunhu juno itavula nu mwojo um'balafu <sup>8</sup> pe uNguluve ikuvafunyagha mu nyinga kuuti jaatu muvisaghe ni finu fyoni fino mulonda, neke muvusaghe vaanhu va kuvomba inofu inyinga. <sup>9</sup> ndavule lilembilue kuuti, Atavwile ikyuma kyake kuku-vapeela avakotofu. uvukoola vwake vwa fighono fyoni. <sup>10</sup> Ghwope juno ikumpeela umuunhu imbeju ija kuvyala nu n'kate ghwa kulia, ikuvapeela imbeju ija kuvyala na kukuvongele-sia. umwene ilikwongelezia umpeto ghwinu ughwa mwojo ghwa vukoola. <sup>11</sup> ikupapelagha uvumofu mu sooni kuuti, muvisaghe vapeesi. mu uluo vikumuhongesyagha uNguluve kukilila usue. <sup>12</sup> ulwakuva imbombo iji jino muvomba nakwekuti jitanga va vitiki vano vaghilue, looli jipelela avaanhu vinga vamhongesiaghe fiijo un-guluve. <sup>13</sup> imbombo iji jino muvomba jihufia kuuti umue muli vavombi vanofu mu uluo avaanhu vikumughinia uNguluve. vikumugh-inia vwimila uvukundi vwinu uvwa kwitika imhola inofu ija Kilisite. kange vikumugh-inia pano vikuvwagha uvukoola vwinu mulwa kuhangilanila ifinu palikimo na veene na vange vooni. <sup>14</sup> vavasyukilue, kange vikuvasumila. vivomba uluo vwimila ulusungu uluvaha luno uNguluve avapeliile. <sup>15</sup> tumuhongesiaghe uNgu-luve vwimila ikipelua ikivaha ikya kudegha, kino atupeliile.

## **Uvwandulilo vwa 10**

<sup>1</sup> une ne Paulo, ne juno nivoneka nili mhuugu pano nili palikimo numue, neke nivoneka nili

n'kali pano nili kutali numue, nikuvasuuma mu lujisio na mu vuhugu vwa Kilisite, <sup>2</sup> niliiva nisile kulumue. nikuvasuuma umue kuuti, un'siki ghuno niliiv nisile kulumue nanilonda kuuva n'kali. neke ninoghiile kuuva n'kali ku vaanhu vooni vano visaagha kuuti usue tuingilila isa mu iisi. <sup>3</sup> ulwakuva nambe ndave tukukala mu iisi, natulua ilibaatu ndavule ava mu iisi. <sup>4</sup> ulwakuva ifilwilo fino tulwila ililugu ilio nafya mu iisi, ulwene fili ni ngufu kuhuma kwa Nguluve isa kunangania amalinga gha valugu. tunangania amasio ghooni agha vudesi. <sup>5</sup> kange tunangania amasio ghooni agha kughinia ghano ghisigha avaanhu kuuti, valeke kukun'kagula uNguluve. kange tughoma amasaaghe ghooni kuuti ghan'kundaghe uKilisite. <sup>6</sup> neke muliiva mukundile lwoni, usue tuling'hanisie kuhigha inongua sooni sino nasa vukundi. <sup>7</sup> mu lolaghe fino fivoneka pamaaso ghiinu, umuunhu ghweni juno ikuvona kuuti umwene ghwa Kilisite, leka ikumbusie jujuo mwene kuuti ndavule alivuo kuuva ghwa Kilisite, najusue tuli va Kilisite ndavule umwene. <sup>8</sup> nakyaniivona soni ningighinie vwimila uvutavulilua vuno uMutwa atupeliile, ulwakuva uvutavulua uvuo navukuvanangania, looli vukuvatanga mu lwitiko. <sup>9</sup> mu kalata sango sino nikuvalembela, nanilonda kukuvoghofia. <sup>10</sup> ulwakuva avaanhu vamonga viiti “ikalata sa Paulo sili na masio amakali kange sili ni ngufu, looli kim'bili umwene nsila ngufu. amasio gha mwene namaghana kupulikisia” <sup>11</sup> avaanhu ndavule avuo vakagulaghe kuuti, sino tukavalembile mu kalata pano tu-

likutali, se sino kya tuvomba pano tuli numue. <sup>12</sup> natukuviika nambe padebe mu kipugha kimo nambe kukughwanania na vaanhu vano vikughinia vavuo. neke avaanhũ vano vikuling'hania na kukughwanania vavuo, navakitang'inie kimonga. <sup>13</sup> poope, nakyatukughinia kukila ikighelelo ikya mbombo jino atupeliile uNgluve. ulwene tuvomba ulue n'kate mu kighelelo kino uNgluve atupeliile usue, ijio je jino luvomba lwoni kulumue nambe kutali. <sup>14</sup> ulwakuva natukakiling'hinie jusue ikighelelo ye lukwisa kulumue. tulyale vakwanda kukuvaletela imhola inofu ija Kilisite. <sup>15</sup> nakya tukughinia vwimila imbombo ja vaangu avange. ulwene, tuhuvila vule ulwitiko lwinu lukwongelesa, na ji mbombo jitu pakate pa lumue ji kwongelesa. <sup>16</sup> tuhuvila ku ulu kuuti kyande tupulisia iMhola iNofu na ku iisi isingi, nakyande tukughinia vwimila imbombo jino jivombua imbale isingi. <sup>17</sup> looli, umuunhu ghweni juno ikughinia, ighinaghe vwimila uMutwa. <sup>18</sup> ulwakuva umuunhu ghweni, juno ikughinia jujuo nakwitikisivua, looli juno ighinisivua nu Mutwa.

## **uvwandulilo vwa 11**

<sup>1</sup> poope nambe nijova hwene nilin'jasu nisuma mhumhulikisie, looli muvwa kyang'haani, muli nu lugudo nuune. <sup>2</sup> une nili nikivavilisi numue, ikivavilisi iki kihuma kwa Ngluve, ulwakuva muli ndavule umhinja juno naamanyile umughoosi, juno nikan'tavwile kutolua nu mu ghoosi juno ghwe Kilisite. <sup>3</sup> neke lino nikwoghopa kuuti, ndavule uEefa vule

alyasyangilue ni njoka jila in'sumbufu, najumue kyande musyangua, mukuvuleka uvugholofu nu lughano lwinu ulwa kyang'haani kwa Kilisite. <sup>4</sup> ulwakuva ndepoonu ikwisa umuunhuu ujunge kupulisia uYeesu ujunge, juno usue natukampulisie. nambe mukumwupila uMhepo ujunge, juno na ghwe juno mukupiile kulyusue, nambe mukwupila imhola ijingi, jino namukwupiile kuhuma kulyusue. mungigude ku isio, kuva lukwiliine! <sup>5</sup> une nakwekuti nili n'debe kukila vuo vano vitambulua vasung'hua vavaha. <sup>6</sup> neke lino nambe nanivulanisivue kudalikila, uvukagusi vwango vukome. tuhufisie uluo kulyumue mu sooni sino tuvombile, kange vukagulike kulyumue. <sup>7</sup> asi, nikavombile fivi pano nikajisisie mu lwa kupulisia imhola inofu ija Nguluve kulyumue, kuuti umue mughinisivue? <sup>8</sup> ye nivomba imbombo kulyumue, nupilagha ulutango kuhuma kufipugha ifingi ifya vitiki. mu uluo nikaale hwene nikuunya ifinu fwave, neke nivatange umue. <sup>9</sup> un'siki ye nili palikimo numue, pano naghiluagha nanikaale n'sigho kwa muunhu, ulwakuva avitiki vano vakahumile ku Makedonia vakamheliile fino nilonda. mu uluo nikaale nikulolelela kuuti nileke kuuva n'sigho kulyumue, kange nifikulolelelagha. <sup>10</sup> ndavule uvwakyanghaani vwa kilisite vule vulivuo mun'kate mulyune, nakwale nambe jumo mulikaaja lwoni ilya Akaya, juno kya ikusigha kukughinia vwimila imhola iji. <sup>11</sup> lwa kiki? ulwakuva nanivaghanile? uNguluve akagwile kuuti nivaghanile. <sup>12</sup> nifivombagha ndavule nivomba lino, kuuti avasung'hua avuo

vano viiti ve vavaha, vakunue ikya kughinia kuuti nivomba ndavule usue. <sup>13</sup> ulwakuva avaanhu avuo vasung'hua vavudesi, ve vavombi avasyangi, vikuviika hwene vasung'hua va Kilisite. <sup>14</sup> mu uluo natudegha, ulwakuva naju Setano jujuo ikuviika hwene nyamhola ghwa lumuli. <sup>15</sup> kange natudegha pano voope avavombi vaake vikuviika hwene vavombi vagholofu. uvusililo vwake vilikwupila sino siling'hiine ni mbombo saave. <sup>16</sup> nijova kange, napeangavisaghe umuunhu ghweni juno isagha kuuti, une nilin'jaasu. neke nambe mwiti nilin'jaasu, nikuvasuuma mhumhulikisie, neke najune nighinie padebe. <sup>17</sup> amasio ghano nijova lino aghakughinia, nanilaghilue nu Nguluve, looli nijova hwene muunhu n'jaasu. <sup>18</sup> ulwakuva vinga vikughinia vwimila isa m'bili, najue nighinie. <sup>19</sup> umue muli nu luhala, fyenambe mukuguda na kukuvakunda nu lukeelo avaanhu avajaasu. <sup>20</sup> mukuguda na kukun'kunda nambe umuunhu juno angakuviike mu vukami, nave ipelela kubaghulana n'kate mulyumue, nave ikuvatumila umue ku luvumbulilo lwa mwene, nambe ikughinia na kukuvavapula ku maaso. <sup>21</sup> nivona soni kujova kuuti pe usue tukaale vavotevete kuleka kuvomba isio. lino nave kwale umuunhu ghweni juno ikughinia - nijova hwene nilin'jaasu - najuune ninoghiile kukughinia. <sup>22</sup> asi! aveene vaYahudi? najune nili muYahudi kikola kya Abulahamu? najune nili kikola kya Abulahamu. <sup>23</sup> asi! aveene vavombi va Kilisite? (nijova hwene nihasing'hinie uluhala.) une neene m'bombi

ghwa Kilisite kukila aveene. une nighimbilue kuvoma imbombo kukila, ke kinga nidindilue mu ndinde, ke kinga nitovilue kyongo. kange ke kinga navisagha mu lutalamu ulwa kufua. <sup>24</sup> nitovilue na vaYahudi ing'hwego fijigho fitatu nabusika lubale, nivombilue uluo <sup>25</sup> kahaano. nikopilue ning'hwegho katatu. nitovilue kamo na mavue. nikulwike katatu mu ngalava. nikikalile mu nyanja pakilo na pamwisi. <sup>26</sup> ke kinga pano nakyulagha, navisagha mulutalamu ulwa fikogha, mulutalamu ulwa vahiji av-abudi, mulutalamu kuhuma kuvajango, mu lutalamu ulwa vano navitiki, mulutalamu ulwa mulikaaja, mulutalamu ulwa kulihaka, mulutalamu ulwa mu nyanja, mulutalamu luno luhuma ku vanyalukoloavadesi. <sup>27</sup> nivombile imbombo inhalamu na kupumuka ke kinga ninoghonile maaso, nipumwike ni njala ni kyumilua, ke kinga nikalile kisila kulia, na kukukala ku mhopo na kuuva kisila mhenda. <sup>28</sup> palikimo nisio sooni, jaatu nisagha vwimila ifipugha ifya vitiki. <sup>29</sup> nave jumonga m'botevete, najuune nikupulika m'botevete. nave jumonga van'kuvisie najuune niiva muvuvafi. <sup>30</sup> nave lunoghiile, nikughinia vwimila uvuvotevete vwango. <sup>31</sup> uNguluve nu Nhaata ghwa Mutwa Yeesu juno anoghiie kughinisivua ifighono fyoni, akagwile kuutinanjova vudesi. <sup>32</sup> ye nili mu likaaaja lya Damesiki, umulongosi juno akalongosiagha ikighavo kino kyale mu vutwa vwa Ntwa uAleta, alyavikile avaloleleli mu likaaaja ilio kuuti vang'hole. <sup>33</sup> looli avaanhvu vamonga vakanyisia mu kiivo kukilila pa lidilisa lino lyale mu luvumba nikakuluka



kukolua

## Uvwandulilo vwa 12

<sup>1</sup> ninoghiile kukughinia nambe nakuvumbulila kimonga. looli nitapikughinia vwimila in-yivonelo ni mhola isingi sino ambonisie uMutwa. <sup>2</sup> nimmanyile umuunhu jumo mwa Kilisite, juno amaka kijigho na ghane gha kilile, alyatolilue kuhanga kufika ku vulanga uvwa kukyanya fiijo. — apuo nanikagwile pamo alyale mu m'bili ughu, pamo naalyale mu m'bili ughu, looli uNguluve ghwemwene akagwile. <sup>3</sup> kange nikagwile kuuti umuunhu uju - pamo alyale mu m'bili ughu, pamo naalyale mu m'bili ughu, une nanikagwile, looli uNguluve ghwe mwene akagwile. <sup>4</sup> alyatolilue kuhanga kufika ku pal-adiso ukuo akapulika amasio amimike kyongo ghano umuunhu naangajove kange naanoghile kujova. <sup>5</sup> lino nikughinia vwimila umuunhu ujuo. une nanikughinia vule nilivuo, ulwene nikughinia vwimila uvuvotevoto vwango. <sup>6</sup> nambe naale nilondaghe kukughinia, naale niiva n'jaasu, ulwakuva naale niiva nijova isa kyang'haani. lino nikusigha kukughinia, kuuti umuunhu ghweni alekaghe kukumbona une kuuti ninoghiile kyongo kukila sino vikusivona na kukusipulika kuhuma kulyune. <sup>7</sup> neke kuuti nileke kukughinia kyongo vwimila inyinga isa kudegha sino uMutwa uYeesu ambonisie, nikapelua ulupumuko mum'bili ghwango luno luli ghwene mafua. ulupumuko uluo nsung'hua ghwa Setano, asung'hilue kuuti amhumhusie, neke nileke kukughinia. <sup>8</sup> nikansuuma uMutwa

katatu kuuti amhoke mulupumuko uluo. <sup>9</sup> neke umwenen akam'buula akati, ulusungu lwango lukukukwila, ulwakuva muvuvotevotote mwe muno ingufu sango sivoneka. mu uluo nikughiniagha nu lukeelo ulukome vimila uvuvotevotote vwango, kuuti ingufu sa Kilisite sivisaghe numue. <sup>10</sup> lino nili nulukeelo vwimila uvuvotevotote, kulighua, kuuva mu nhalamu, kuuva mulupumuko na kuhangajisivua vwimila uKilisite, ulwakuva pano niiva m'botevotote, pe pano niiva ni ngufu. <sup>11</sup> lino une nili n'jaasu umue mwemue mumheliile ku ulu. umue muveela munoghile kukunginia, ulwakuva nambe nivoneka kuuti naninoghiile, une nanili nsunghua n'debe kukila avuo vano vitambulua vasung'hua vavaha. <sup>12</sup> ye nili ku lyumue nikaale nu lugudo na kuvomba ifidegho ni fi valilo fino fyahufyagha kuuti une nili nsung'hua. <sup>13</sup> nakwekili kimonga kino nivombile kufipugha ifingi ifya vitiki. neke nanivombile kulyumue. ulwene kuuti pano nanikaale n'sigho kulyumue? neke uvuo vwe vwitiki vwango, mun'saghilaghe. <sup>14</sup> lolagha! une nikulinga'hania kukwisa kulyumue ulwa vutatu. neke naningave n'sigho kulyumue ulwakuva nanilonda ifiinu fiinu, nikuvalonda umue. ulwakuva avaanha navanoghiile kuvuta ifiinu kuuti five fya vapafi, looli avapafi vanoghiile kuvuta ifiinu kuuti five fya vaanha. <sup>15</sup> une nili nu lukeelo kuumia ifiinu fyango na kukuhumia juune kukuvatanga umue. nave nikuvaghana fiijo, ninoghiile kughanua padebe? <sup>16</sup> neke ndavule lulivuo, une nanikaale n'sigho kulyumue. looli ulwakuva une

nili n'sufu fiijo, nihwene juno avakoovile nu vusyangi. <sup>17</sup> asi! nikatoliile kimonga kulumue mulwa kukava uluyumbulilo kukilila avaanhu vano nikavasung'hile? <sup>18</sup> nikan'sumile uTiito palikimo nu nyalukolo ghwitu ujunge kuuti iise kulumue. asi! uTiito akatoolile kimoga kulumue? asi! natukagwile musila jila jila? vule, natukaghendile mu sajo sila sila? <sup>19</sup> musagha kuuti un'siki ghwoni ughu, tukujooleka kulumue kuuti muleke pikutuvona kuuti tulivavivi pa maaso ghiinu? tujova isi ulwakuva tuli vavombi va Kilisite, na ju Nguluve akagwile, isi sooni tuvomba kukuvatanga mukangale mu lwitiko. <sup>20</sup> lino nikwoghopa kuuti, niliiva nikwisa kulumue nili kuvagha muli nu luveelo luno nanikeela une. nikwoghopa kuuti ndepoonu nilikuvaagha muli na mabaatu, ni giila, ni ng'halaasi, nu vusulani, kudeselanila kukughinia kuuva na matiling'hano. <sup>21</sup> kange nikwoghopa kuuti niliiva nikwiisa kulumue, uNguluve ghwango ilikumbiika nivone soni pa maaso ghiin. nilisukunala kuvona avaanhu vinga mulumue vano vakavombile inyivi ulutasi, navalatile. vajighe na maghendele agha vuvwafu, uvughendamwalu nu vunoghelua uvunge vuno vakaale navwo.

## Uvwandulilo vwa 13

<sup>1</sup> ulu luuva lwa vutatu une kukwisa kulumue “lunoghiile un'kole uvwolesi vwake vukagulik-aghe na vooleso vavili nambe vatatu. <sup>2</sup> ye nisile ukuo ulwa vuvili, nikavavulile kuuti, niliivi nikwisa naniliiva ni kisa kuveene na kuvange

vooni. <sup>3</sup> ulu, nikuvavuula umue ulwakuva mulonda ikivalilo ikya kukagula nave uKilisite ijova kukilila une. ulwene nam'botevoto kulyumue, looli umwene ghwe nya ngufu. ghwe juno ivomba imbombo n'kate mulyumue. <sup>4</sup> poope, nambe alyale n'sila ngufu ye ikomelua pa kikovekano, lino mwumi mu ngufu sa Nguluve. fye enendiki najusue tuli vasila ngufu mwa Kilisite, neke pano tukuvavombela umue, tuuva vwumi palikimo nu mwene mu ngufu sa Nguluve. <sup>5</sup> lilo, mughelaghe jumue neke mukagule nave muli nu lwitiko. asi, namukulutang'hania kuuti, uYeesu Kilisite ali n'kate mulyumue? umwene mwale, looli nave namukulutang'hania mukunilue. <sup>6</sup> neke nihuviila kuuti, umue kya mukulutang'hania kuuti usue natukanilue. <sup>7</sup> lino tukuns'uuma uNguluve kuuti namungavombaghe inyifi. nanisuma kuuti usue tuhwene tusilolile ingelo, ulwene tusuma kuuti muvombaghe inofu, nambe usue tuvoneka hwene tukunilue ingelo. <sup>8</sup> ulwakuva natuliningufu isa kusigha uvwa kyang'haani, looli kughina kupulisia uvwakyang'haani. <sup>9</sup> ulwakuva tuhovoka pano usue tulivavote vote, neke umue muli ni ngufu. tukun'suuma uNguluve avatange muuve vagholofu. <sup>10</sup> nikuvalembela amasio agha pano nikyale kukwisa, kuuti ni-iva nikwisa kulyumue, naningasivonaghe sino ndepoonu sikumheela niive n'kali vwimila uvutavulua vuno amheliile uMutwa. ulwakuva uMutwa naamheliile uvutavulua uvwa kuvanangania, looli uvwa kuvatanga mu lwitiko. <sup>11</sup> lino vanyalukolo vango, muhovokaghe muvis-

aghe vaghlofu, munyamasaniaghe, muvisaghe vumo, muvisaghe nu lutengano. naju Nguluve unya lughano nu lutengano iiva palikimo numue. <sup>12</sup> mu hungilanaghe mu lughano lwa Kilisite. <sup>13</sup> avitiki vooni vikuvahungila. <sup>14</sup> ulusungu lwa Mutwa Yeesu Kilisite, nu lughano lwa Nguluve, nu vuhangilanisi vwa Mhepo uMwimike, fivisaghe palikimo numue mweni.

# **Vwanji Bible**

## **The New Testament in the Vwanji language of Tanzania**

copyright © 2020 Door43 World Mission Community

Language: Kivwanji (Vwanji)

Translation by: Door43 World Mission Community

Contributor: Cloud Roman, ITTO, Mwj. Lucas Ndugu, Tiralaleli Ndugu, Julieth Ngogo, Vwanjimt

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-11-10

---

PDF generated using Haiola and XeLaTeX on 22 Feb 2024 from source files dated 31 Aug 2023

0fe8b31a-d7bb-5580-ae6c-d8de2d786d46